

COMUNICATO n. 1975 del 25/07/2024

Enlongia n fil de la pèsc sun Roda de Vael

[Ladino] Fascia, tera teater de pruma linia de la Gran Vera, la cern de fèr rembombèr l valor de la pèsc, sporjan desche paladina la Dolomites. En sabeda ai 27 de messèl, entorn la 2 domerena, la Utia de Vael e la Baita Marino Pederiva sarà coleèdes da na slack line sun chela che l funambol Andrea Agostini caminarà e jiarà per aria, aut più che 30 metres, compagnà da elements e paroles per ge recordèr al mond l valor de la pèsc. Equilibrie, concentrazion, marevea, forza de volontà e braura vel portèr dant coche la mont l é stat mère e tera che à sepoli e ninà sacotenc joegn sudé e che ades la domana respet, demò acort e contenteza te sie gremen. Chest l é l messaje che l endrez del Festival dessema col Museo e l Istitut Cultural Ladin “majon di fascegn” vel ge sporjer a chi che dezidarà de jir sa mont per tor pèrt adum a la manifestazion.

Apuntament donca ai 27 de messèl - te la seconda dì del Circen Dolomites Festival - entorn ora de marena, sun Vael, delaita da la rassegna de evenc Monc de Pèsc-Montagne di Pace, endrezèda per la zelebrazions del diejem cedeàn de la Mostra “1914-1918 “La Gran Vera - La Grande Guerra: Galizia-Dolomiti” de Moena. Cultura ladina e èrt da circh se metarà ensema per zelebrèr la beleza e la solidarietà, elements fundamentèi per ge dèr vita a n mond più bel.

L Circen Dolomites Festival l é la rassegna de zirch più auta de la Tèlia en program da en vender ai 26 de messèl a en vender ai 2 de aost te Fascia. L é tegnù su da desvalives sogec istituzionèi e privac, tel particulèr da la Region Trentin-Sudtirolo, da la Provinzia de Trent e dal Comun e Sèn Jan.

“Monc de Pèsc - Montagne di Pace” l é n event endrezà da Istitut Cultural Ladin “majon di fascegn”, Sociazion “Sul Fronte dei Ricordi” e Comun de Moena en colaborazion con Apt de Fascia e l didament finanzièl de la Region Trentin-Sudtirolo per zelebrèr i 10 egn de la Mostra “1914-1918 “La Gran Vera - La Grande Guerra: Galizia-Dolomiti” inaudèda te Teater Navatge del 2014, da poder veder a Moena fora per dut istà.

(S.Ra.)